



AUGUSTUS GUILIELMUS A SCHLEGEL

LECTORI

S.

**I**n ea, quae adhuc fuit, hodieque perdurat, librorum Sanscritorum typis excusorum penuria, talium praesertim, qui tironibus commode exponi, aut ab ipsis adeo sine magistri auxilio legi possint, iam dudum utile mihi erat visum, parare novam editionem complexus fabularum narrationumque lepidissimarum, Hitôpadêsae nomine celebrati. Exstant quidem binae huius libri editiones, quarum altera anno 1804 Sriramapuri in Bengalia, altera sex annis post Londini prodiit. Sed ambae admodum sunt mendosae; Londinensis ultra etiam, quam ut credibile sit cuiquam, nisi qui accurate et singulatim exploraverit. Nulla autem re minus carere possunt exordia studii difficillimi quam textu castigato. Etenim quanto magis perseverantia et ingenii acumine pollet tiro, eo difficilius sibi ipsi satisfaciet: aliquid sese latere putabit, et omnem lapidem movebit, ut istud eruat, quotiescunque, vel sine ulla culpa sua, propter editoris ignoran-